



Broj/Broj: **03/1-50-14-7-6/11**
Sarajevo/Sarajevo, 18. 10. 2011. godine

PREDMET: Informacija o posjeti Narodnoj skupštini i Ministarstvu odbrane Republike Srbije

Članovi Kolegija Zajedničke komisije za odbranu i sigurnost BiH (ZK): Dušanka Majkić, predsjedavajuća, Borjana Krišto, prva zamjenica predsjedavajuće, Šefik Džaferović, drugi zamjenik predsjedavajućeg, i Željko Grubešić, stručni savjetnik, posjetili su 28. i 29. septembra 2011. godine Narodnu skupštinu i Ministarstvo odbrane Repulike Srbije.

Posjeta je realizirana uz podršku Misije OSCE-a u BiH. Šejla Begtašević, pravnik iz Odjela za sigurnosnu saradnju Misije OSCE-a, boravila je s članovima ZK u Beogradu.

28. septembar 2011. godine

Članovi Kolegija ZK imali su susret s članovima Odbora za odbranu i sigurnost, zajednički sastanak s članovima Odbora za ustavna pitanja i Zakonodavnog odbora, zajednički sastanak s članovima Odbora za vanjske poslove i Odbora za evropske integracije Narodne skupštine Republike Srbije kao i predsjednicom Narodne skupštine Republike Srbije Slavicom Đukić-Dejanović.

Tokom razgovora s rukovodstvom i članovima **Odbora za odbranu i sigurnost** koje je predvodio Dušan Bajatović, predsjednik Odbora, razmijenjena su mišljenja o radu dva odbora, o trenutnim aktivnostima kao i mogućnostima unapređenja bilateralne i regionalne saradnje.

Predsjedavajući Bajatović govorio je o budžetu za potrebe sektora odbrane i sigurnosti istakavši da novca nema dovoljno te da Republici Srbiji trenutno treba još 14 hiljada policajaca. Tokom razgovora razmijenja su mišljenja o načinu izrade i usvajanja strateških dokumenata, slanju pripadnika oružanih snaga u mirovne misije, strukturi budžeta za potrebe odbrane i sigurnosti, parlamentarnom nadzoru i zakonskim i podzakonskim aktima koji reguliraju tu oblast te profesionalizaciji oružanih snaga i političkim izazovima koji prate reformske procese. Sastanku su prisustvovali Konstantin Samofolov i Meho Omerović, članovi Odbora.

Zajednički sastanak s članovima **Odbora za ustavna pitanja i Zakonodavnog odbora** protekao je u razgovorima o pitanjima kojima se trenutno najviše bave ta dva odbora. Vlatko Ratković, predsjednik Odbora, Nada Kulundžija, zamjenica predsjednika, i Bajram Omeragić, upoznali su članove ZK o sadržaju novog Poslovnika NS R Srbije koji će se početi primjenjivati od narednog saziva Skupštine. Brojne su izmjene, a suština je da parlamentarne aktivnosti treba da se intenziviraju u odborima, što do sada nije bila praksa.

Razgovarano je i tzv. kontrolnim mehanizmima u radu skupštine, izbornim zakonima, kontrolnoj funkciji parlamenata, reviziji, praksama saslušanja vlada, usklađivanju zakona sa zakonima zemalja članica EU, odnosu srbijanske skupštine sa Ustavnim sudom i mnogim drugim pitanjima iz parlamentarne prakse.

Zajednički sastanak s članovima **Odbora za vanjske poslove i Odbora za evropske integracije** koje su predstavljali Laslo Varga, predsjedavajući, Gordana Ćomić, zamjenica predsjedavajućeg, Nataša Vučković, član, protekli su u razgovorima o bilatelarnim odnosima i regionalnoj saradnji gdje je konstatirano da je evidentan napredak i sve bolje razumijevanje u brojnim sferama koje inače karakteriziraju odnose dvije susjedne zemlje.

Obostrano je konstatirano da je potrebno organizirati češće razgovore radnih tijela parlamenta. Nedvosmisleno je podržan evropski put i Bosne i Hercegovine i Republike Srbije gdje je naglašena potreba izgradnje još većeg povjerenja jer za to ima prostora i želje s obje strane.

Slavica Đukić – Dejanović, predsjednica Skupštine, tokom sastanka s članovima ZK izrazila je zadovoljstvo susretom. Naglasila je potrebu češćih susreta jer dijelimo mnoge civilizacijske vrijednosti. Razgovarano je o potrebi komunikacije s građanima i otvorenosti parlamenta do prosječnog čovjeka, o potrebi da građani budu pravovremeno informirani o radu parlamenta, o usklađivanju zakona sa EU, pripremi i raspravi o prijedlozima zakona, ulozi žena u političkim i drugim krugovima, radu odbora te potrebi da se više i s pravim pokazateljima govori o ekonomijama dvije zemlje i mogućnostima saradnje u toj oblasti. Predsjednica Đukić-Dejanović izrazila je želju da posjeti Bosnu i Hercegovinu, Parlamentarnu skupštinu BiH i njene institucije s ciljem unapređenja bilateralnih odnosa, saradnje parlamenata i saradnje regiona u cjelini.

Članovi ZK su nakon radnih sastanka u Skupštini Republike Srbije posjetili Ambasadu Bosne i Hercegovine u Republici Srbiji gdje su sa osobljem Ambasade razgovarali i informirali ih o aktuelnim političkim zbivanjima u BiH. Razgovaralo se i o aktivnostima službenika Ambasade koje je tokom susreta predstavljao Radomir Bogdanović, konzul, i brigadir Ivica Pavić, vojni ataše BiH u Srbiji.

29. septembar 2011. godine

Članovi Kolegija Zajedničke komisije za odbranu i sigurnost posjetili su Ministarstvo odbrane Republike Srbije, Generalštab Vojske Srbije i Centar za mirovne operacije.

U Ministarstvu odbrane R Srbije Igor Jovičić, državni sekretar, pozdravio je članove ZK i informirao ih o aktuelnom trenutku reformi u sektoru odbrane R Srbije. Posebno se osvrnuo na proces profesionalizacije Vojske Srbije, strukturu budžeta za odbranu, vrlo dobru bilatelarnu saradnju s Ministarstvom odbrane BiH, jačanje regionalne saradnje, posebno u vojno-ekonomskom sektoru, parlamentarnom nadzoru sektora odbrane i sigurnosti, slanju trupa u mirovne operacije te mogućnostima realizacije zajedničkih projekata. U svom izlaganju osvrnuo se na aktivnosti oko izrade tzv. Bijele knjige gdje je u cjelini prezentirano stanje i perspektive u sektoru odbrane kao i zadaci MO i Generalštaba Vojske Srbije u budućnosti.

Brigadni general Slađan Đorđević, načelnik Uprave za kadrove MO Srbije, prezentirao je temu: "Upravljanje ljudskim resursima u sistemu odbrane Republike Srbije". Posebno se osvrnuo na organizaciju MO i Vojske R Srbije te pitanje: „Kako transformirati postojeći sistem upravljanja ljudskim resursima, u skladu sa savremenim standardima i realnim mogućnostima, u sistem koji bi doprinio uspješnijem funkcioniranju sistema odbrane Republike Srbije“.

Prezentirao je strukturu kadra Vojske Srbije u sistemu odbrane, oblastima upravljanja ljudskim resursima, međunarodnim iskustvima u upravljanju ljudskim resursima.

U razgovoru s Kolegijem Zajedničke komisije posebno se osvrnuo na reformu sistema upravljanja ljudskim resursima što obuhvata izradu: strateško-doktrinarnih dokumenata, normativno-pravnih dokumenata kojima će se institucionalizirati postupci i procesi radi ostvarivanja definiranih ciljeva te planova, programa, projekata, pravilnika, uputstava i drugih dokumenata kojima će se novi sistem upravljanja ljudskim resursima do kraja urediti. Razgovarano je i o standardu i statusu profesionalnih vojnih lica.

Predstavnici Sektora za politiku odbrane MO Republike Srbije prezentirali su Strategiju nacionalne sigurnosti i strategiju odbrane Republike Srbije. Pukovnik Peta Kraljević i Brankica Potkonjak-Lukić naglasili su da su usvajanjem Ustava Republike Srbije 2006. godine stvoreni uslovi za provođenje reforme sistema odbrane u okviru strategijsko-doktrinarnih i normativno-pravnih sfera.

U procesu stvaranja odgovarajućeg strategijsko-doktrinarnog okvira za reformu odbrane, izrađeni su sljedeći dokumenti:

- Strategija nacionalne sigurnosti,
- Strategija odbrane, i
- Doktrina Vojske Srbije, kao osnovni doktrinarni dokument za pripremu, organizaciju, upotrebu i osiguranje Vojske Srbije.

Kada je riječ o normativno-pravnoj sferi, 2007. godine donijeti su osnovni sistemski zakoni, prije svega Zakon o odbrani i Zakon o Vojsci Srbije, kao i veći broj podzakonskih akata koji iz njih proističu.

U 2009. godini usvojen je set sljedećih zakona: Zakon o upotrebi Vojske Srbije i drugih snaga odbrane u multinacionalnim operacijama van granica Republike Srbije, Zakon o Vojnosigurnosnoj i Vojnoobavještajnoj agenciji, Zakon o civilnoj službi, Zakon o vojnoj, radnoj i materijalnoj obavezi, Zakon o izmjenama i dopunama Zakona o odbrani, Zakon o izmjenama i dopunama Zakona o Vojsci Srbije.

Kao dokument godišnjeg planiranja, u MO izrađuje se Ministarsko uputstvo.

Kada je riječ o nacionalnim interesima Republike Srbije u oblasti sigurnosti, najznačajniji su:

- Očuvanje suvereniteta, nezavisnosti i teritorijalne cjelovitosti Republike Srbije;
- Očuvanje unutrašnje stabilnosti, vladavina prava i razvoj demokratije,
- Integracija u EU i druge međunarodne strukture;
- Ekonomski razvoj, uz očuvanje okoliša i prirodnih resursa;
- Stvaranje mirnog, stabilnog i sigurnog bezbjednosnog okruženja.

O regionalnoj saradnji govorila je Radmila Veselinović, rukovodilac Grupe za Evropu. Sporazum o saradnji u oblasti odbrane s Bosnom i Hercegovinom je primjer za region i uspješno se realizira u brojnim segmentima, posebno u školovanju. Regionalni kapaciteti MO R Srbije su izuzetno veliki. Težišne oblasti saradnje su: školovanje i obuka, vojnomedicinska saradnja i vojnoekonomska saradnja

O saradnji Republike Srbije s NATO-om govorila je Tanja Ristić koja je naglasila da je težišni cilj dostizanje Ciljeva partnerstva (42) pod okriljem PARP radi izgradnje sposobnosti deklariranih snaga VS što podrazumijeva vrlo tijesnu saradnju s NATO-om kroz Program Partnerstvo za mir. Prezantacioni dokument IPAP između RS i NATO-a usvojila je Vlada na sjednici održanoj 14. jula 2011. godine. Pripadnici MO i VS aktivno učestvuju u radu tehničkih panela u organizaciji NATO Agencije za istraživanje i razvoj (RTO) radi osiguranja podrške na polju nauke i istraživanja.

O strukturi budžeta MO R Srbije članove ZK upoznao je major Dejan Krpić. Govorio je o odnosu budžeta za odbranu i GDP R Srbije, strukturi odobrenog finansijskog plana, strukturi rashoda i izdataka odbrane vez vojnih penzija te činjenici da se za personalne troškove izdvaja 67,1% vojnog budžeta. Oko 1.41% GDP se izdvaja za budžet za odbranu, a sa izdvojenim sredstvima za vojne penzije to dostiže iznos od 1.9% GDP.

U Centru za mirovne operacije Generalštaba Vojske Srbije članove ZK primio je pukovnik Saša Stefanović, zamjenik komandanta Centra. U samom uvodu je naglasio izuzetno dobru i profesionalnu saradnju sa Centrom za mirovne operacije u Butmiru s kojim realizuju vrlo uspješno brojne regionalne projekte.

Pukovnik Stefanović prezentirao je rad Centra gdje je evidentno da se vojnici Vojske Srbije pripremaju za mirovne misije u sklopu UN-a. Razvijaju se programi obuke za EU misije i programi obuke za deklarirane snage kroz NATO Program partnerstvo za mir.

Centar raspolaže izvanrednim kapacitetima i kroz planove i procedure angažiranja postižu se visoki standardi.

Nakon prezentacija u MO R Srbije, Generalštabu Vojske Srbije i Centru za mirovne operacije članovi Kolegija ZK razgovarali su s domaćinima o brojnim pitanjima koja su bila predmet prezentacija.

Zaključak:

Posjeta Narodnoj skupštini Republike Srbije, Ministarstvu odbrane, Generalštabu Vojske Srbije i Centru za mirovne operacije protekao je u prijateljskoj atmosferi razumijevanja.

Razgovaralo se o brojnim pitanjima koja imaju za cilj jačanje bilateralne saradnje parlamentarnih tijela, parlamenata i institucija Bosne i Hercegovine i Republike Srbije.

PREDSJEDAVAJUĆA
ZAJEDNIČKE KOMISIJE
Duška Majkić

Dostavljeno:

- naslovu
- a/a